



Publicaziuns officialas dils 06-12-2019

Radunonza da vischnaunca

La proxima radunonza da vischnaunca ha liug gievgia, ils 19 da december 2019 allas 20.00 uras a Sumvitg.

Gliesta da tractandas

1. Avertura e beinvegna
2. Elecziun da 2 dumbravuschs
3. Protocol dalla davosa radunonza communal dils 11-06-2019
4. Tractaziun ed approvaziun dil preventiv communal 2020
5. Fixaziun dils peis da taglia 2020
6. Tractaziun ed approvaziun d'in emprist bancar da 2'000'000 francs
7. Elecziuns da delegai e suppleants en corporaziuns da vischnauncas (perioda d'uffeci 2019-2022)
8. Revisiun parziala dalla lescha davart beins e dretgs immobiliars (DC 100.000)
9. Tractaziun ed approvaziun dil project da catramar la Via da Marias a Sumvitg e concessiun dil credit brut da 120'000 francs
10. Tractaziun ed approvaziun dil relasch digl emprist da 150'000 francs alla Societad cooperativa da consum Surrein-Rabius
11. Orientaziuns
12. Varia

Il preventiv 2020 sa vegnir retratgs sin canzlia duront las uras da spurtegl.

Sumvitg, 06-12-2019

Suprastonza communal

Clom da quens

Il quen communal vegn serraus cun ils 31 da december 2019. Per saver risguardar las expensas fatgas uonn el quen da gudogn e sperdita ein tut quels che han aunc dabiens viers la vischnaunca supplicai da dar quen sil pli tard entochen ils 13 da december 2019. Nus supplichein tuttas fatschentas sco era ils officials da vischnaunca d'observar quei termin.

Sumvitg, 06-12-2019

Suprastonza communal

Allianza da taglia Trun-Sumvitg

Naven dall'entschatta schaner 2020 meina la vischnaunca Sumvitg ensemen cun la vischnaunca Trun ina allianza da taglia. Las taxaziuns dallas vischnauncas da Trun e Sumvitg succedan entras questa allianza el biro digl uffeci da taglia tier l'administraziun communal a Sumvitg. Sper ils convischins da Sumvitg astgan daniev era ils convischins da Trun s'annunziar tier igl uffeci da taglia da Sumvitg tier damondas pertuccont declaronzas da taglia. Igl uffeci sa vegnir contactaus sco suonda:

Allianza da taglia Trun-Sumvitg
Via Quadras Su 10
7175 Sumvitg

Tel: 081 920 25 01
Fax.: 081 920 25 08
E-Mail: info@sumvitg.ch

Sumvitg, 06-12-2019

Administraziun communal

Pignola d'Advent e da Nadal

L'administraziun forestala recomanda da retrer il pigniel da Nadal al singul vischin sco suonda: En ils vischinadis nua ch'ils pigneuls vegnan pinai entras l'unien da giuventetgna supplichein da retrer leu il pigniel da Nadal.

Al vischin che vul pinar sez il pigniel (lubiu ei da pinar mo pégn) eis ei lubiu da pinar tal sin territori communal. Ei vegn denton recumandau da pinar sin terren da pastiras surcarschidas. Scumandau eisi da pinar en plontaziuns, uauls da schurmetg e curtins da schurmetg encunter selvaschinas. En uauls privats eisi scumandau da pinar pignola senza ina lubientscha dil possessur d'uaul.

Nus recumandein era da pinar mo in pigniel e quel prender a casa e buca schar scher entuorn e forsa pinar dus auters.

Per tgi che vul retrer il pigniel dalla vischnaunca valan suandonts termin d'empustaziun:

- **Pignola d'Advent entochen gievia, ils 14 da november**
- **Pignola da Nadal entochen mardis, ils 10 da december**

Las empustaziuns ein da far tier la **canzlia communal (tel. 081 920 25 00)**. La gronda part dalla pignola vegn retratga ord ina scola da plontinas. La pignola vegn taxada sco suonda (prezis excl. tpv.):

grondezia	prezi/toc	
-	< 199 cm	frs. 25.-
-	200-299 cm	frs. 30-
-	300 cm	frs. 35.-
-	325 cm	frs. 45.-
-	350 cm	frs. 60-
-	400 cm	frs. 85.-

Per il schurmetg digl uaul recumandein a scadin da pinar il pigniel da Nadal cun precauziun e senn da responsablidad. Cunterfatgs vegnan punidas tenor il regulativ forestal.

Sumvitg, november 2019

Uffeci forestal Sumvitg

Concert da Nadal dalla Societad da musica Surrein/Rabius

Preziadas convischinas, preziai convischins. Bugen evidain nus Vus a nies concert da Nadal che ha liug da S. Stiafen **ils 26-12-2019** allas 20.00 en baselgia a Rabius. Nus selegrein sin Vossa viseta a nies concert e giavischein a Vus in bi temps d'advent! *La Societad da musica Surrein/Rabius*

Fiasta da Nadal «sin via»

Ils 20 da december festivescha la scola da Trun comunablamein cun tuttas scolaras e scolars e tuttas scolastas e scolasts:

- La damaun marvegli allas 7.10 seradunan tuts affons avon scola. Nus mein silsuenter a pei si Nossadunna dalla Glisch a far ina devoziun da Nadal.
- Allas 8.20 dat ei in pign act festiv cun punsch.
- Silsuenter tuornan ils affons en scola per magliar in grond e bien solver. Leu dat ei era differentas producziuns ed ei vegn cantau canzuns da Nadal.
- Allas 11.35 partan tuts ellas vacanzas da Nadal, il suentermiezdi croda l'instrucziun.

La devoziun da Rorate ed igl act festiv si Nossadunna dalla Glisch ein publics, ils geniturs e la populaziun ein envidai cordialmein! Ils transports da scola cureschan la damaun in'ura pli baul. Scolaras e scolars e lur scolastas e scolasts

Uniun da dunnas dalla vischnaunca da Sumvitg

Sentupada d'Advent per affons da 3–7 onns

Mesjamna, ils 18 da december 2019 dallas 14.00 entochen allas 16.00 ha liug en casa da scola a Surrein ina sentupada per affons da 3–7 onns dalla vischnaunca da Sumvitg. Nus zambergiein da cuminonza ina decoraziun d'Advent, tedlein ina praula e magliein in bien toc petta. Per ulteriuras informaziuns ni damondas stat Giuanna Pelican bugen a disposiziun. Bugen spetgel jeu vossas annunzias entochen gliendisdis, ils 16 da december 2019. Giuanna Pelican, 076 537 78 45. *Cordialmein envidan Benedicta, Giuanna e gidontras*

Uniun da dunnas Sumvitg/Cumpadials

Devoziun d'advent

La devoziun d'advent ha liug **dumengia, ils 15 da december** allas 17.00 en caplutta a S. Benedetg. Ensemen cun la gruppa da liturgia festivein nus la devoziun en caplutta. Silsuenter envidan vischinas e vischins da S. Benedetg pign e grond ad in sitg. Nus selegrein da star in mument da cumpignia cun Vus e guder la biala atmosfera d'advent. *Uniun da dunnas Sumvitg/Cumpadials*

Uniun da scursalets Trun

Scola da hockey sin glatsch e patinar dalla Banca Cantunala

Uonn organisescha l'Uniun da scursalets Trun per la 22avla gada la scola da hockey sin glatsch dalla Banca Cantunala per buobs e buobas naven da quater onns e pli vegls. Per separticipar drova ei ina capellina dad ir cun skis ni da hockey e patinas. Las patinas san vegnir affittadas. Ils trenaments ein mitgamai la mesjamna dallas 17.30–18.15 e supplementarmein la sonda dallas 11.00–11.45. Tgi che ha talent e plascher sa era trenar ulteriuramein la mesjamna allas 18.15 cun ils scolars che dattan hockey. Igl uorden da hockey sa per part medemamein vegnir affittaus. Ei dat era la pusseivladad da far in fuffernadi.

Liug: Patinera Trun (Aschi prest sco ei ha glatsch.)

Datum: Mintga mesjamna dallas 17.30–18.15 e per tgi che ha interess supplementarmein la sonda dallas 11.00–11.45

Informaziuns: Uniun da scursalets Trun, Silvio Albin, Via Splecs 26, 7166 Trun 076 435 14 42
ni per e-mail: salbin@sunrise.ch ni sut: www.udstrun.ch

Resonsabels: Silvio Albin e Mischa Kupka

Plinavon encuretq scolars da tuttas annadas

Nus encurin scolars da tuttas annadas che han plascher da dar hockey sin glatsch e far trenaments regularamein sut survigilonza da carschi. Ils trenaments ein mintgamai la mesjamna dallas 18.15–19.30 ed il venderdis dallas 18.00–19.30. Igl uorden sa per part vegnir affittaus. Ei dat era la pusseivladad da far in fuffergnadi.

Informaziuns: Uniun da scursalets Trun, Silvio Albin, Via Splecs 26, 7166 Trun 076 435 14 42
ni per e-mail: salbin@sunrise.ch ni sut: www.udstrun.ch

Apparat d'udida

Gliendisdis, ils 9 da december 2019 saveis Vus schar schubergiar e rugalar Vies apparat d'udida:

9.15–10.30 en Casa sogn Martin a Trun

11.00–11.45 en Casa sogn Giusep a Cumpadials

13.15–14.30 el Puntreis, Center da sanadad a Mustér

Las firmas Amplifon cun dunna Roffler e Jäggi cun signur Gfeller sorprendan comunablamein quei survetsch gratuit per tuts interessents. Ei drova negina annunzia

Pro Senectute a Cumpadials

Meisa da miezdi (gentar communabel)

Pro Senectute Surselva organisescha ensemen cun Nadja Scolieri ell'Ustria dalla Staziun a Cumpadials ina meisa da miezdi (gentar communabel) inagada per meins, mintgamai il venderdis. Intent dalla meisa da miezdi duei esser da promover la cumminonza ella vischnaunca da Sumvitg e contuorn denter las personas ella vegliadetgna dalla pensiun. Plinavon dat ei la pusseivladad d'embellir quella occasiun cun star suentermiezdi da cumpignia cun dar in scart troccas ni auters giugs.

Liug: Ustria dalla Staziun, 7176 Cumpadials

Datum: **venderdis, ils 13 da december 2019** allas 12.00

Annunzias: Ein da far entochen mesjamna sera tier Ustria dalla Staziun, Cumpadials tel. 081 943 19 22